



PTPTN agih RM231,000 bantu 462 pelajar USM

Oleh Siti Aminah Mohd Yusof - April 3, 2023 @ 2:04pm
bhnews@bh.com.my



Menteri Pendidikan Tinggi, Datuk Seri Mohamed Khalid Nordin (dua, kanan) menyerahkan Bantuan Pengajian KPT-PTPTN Prihatin di Masjid Al-Malik Khalid, USM di sini semalam.
Foto ihsan PTPTN

GEORGETOWN: Perbadanan Tabung Pendidikan Tinggi Nasional (PTPTN) mengagihkan sumbangan kewangan berjumlah RM231,000 kepada 462 pelajar Universiti Sains Malaysia (USM) yang kurang berkemampuan menerusi program Bantuan Pengajian KPT-PTPTN Prihatin di sini, semalam.

PTPTN dalam kenyataannya, berkata penyampaian sumbangan itu telah diadakan pada majlis iftar di Masjid Al-Malik Khalid USM yang disempurnakan Menteri Pendidikan Tinggi, Datuk Seri Mohamed Khalid Nordin.

"Peruntukan bantuan itu diberikan kepada peminjam PTPTN terdiri daripada golongan miskin dan miskin tegar dengan setiap pelajar yang layak telah menerima bantuan sebanyak RM500 secara 'one off' yang disalurkan menerusi akaun bank masing-masing.

"PTPTN sebagai agensi KPT, sentiasa prihatin mengenai kebajikan para pelajar khususnya peminjam PTPTN dengan menyediakan pelbagai inisiatif untuk manfaat golongan itu," katanya.

Yang turut hadir pada majlis itu termasuk Pengerusi Lembaga Gabenor USM, Datuk Seri Dr Awang Adek Hussin; Naib Canselor USM, Prof Datuk Dr Abdul Rahman Mohamed dan Ketua Eksekutif PTPTN, Ahmad Dasuki Abdul Majid.

PTPTN berkata, pelaksanaan program dengan kerjasama Unit Penyelarasian Pelaksanaan (ICU), Jabatan Perdana Menteri dan USM itu bagi memastikan penerima adalah daripada kumpulan sasaran yang layak.

"Justeru, inisiatif Bantuan Pengajian KPT-PTPTN Prihatin diadakan untuk menyalurkan bantuan sara hidup kepada pelajar kurang berkemampuan di IPT dan meringankan beban kewangan mereka.

"Diharapkan inisiatif Bantuan Pengajian KPT-PTPTN Prihatin ini memberi sinar kepada para pelajar untuk terus mencipta kejayaan hebat dalam akademik dan sahsiah sekali gus menjadi kebanggaan ibu bapa," katanya.